

**Dževad Drino\***

**II EUROAZIJSKI SEMINAR RIMSKOGA PRAVA  
(ARASYA ROMA HUKUKU SEMINERI,  
SEMINARIO EURASIATICO DI DIRITTO ROMANO),  
ISTANBUL 30-31 MAJ 2014. GODINE**

**/prikaz međunarodnog naučnog skupa/**

Na univerzitetu *Bahcesehir* u Istanbulu, u periodu 30-31 maja ove godine, održan je II Euroazijski seminar rimskog prava koji je, nakon prvoga koji je održan u Dušanbeu (Tadžikistan) 2011. godine, okupio ponovno veliki broj romanista iz Evrope i Azije i na kome se raspravljalo o položaju rimskog prava u današnjoj fakultetskoj nastavi, ali i sveukupnoj jurisprudenciji i pravnoj nauci.

Učesnici skupa su, pored domaćina iz Turske, stigli iz Poljske, Italije, Tadžikistana, Kazahstana, Gruzije, Rusije, Rumunije, Kine, Srbije, Hrvatske, Crne Gore, dok su boje Bosne i Hercegovine branili prof. dr Dževad Drino sa Pravnog fakulteta Univerziteta u Zenici i asistentica Benjamina Londre, Pravni fakultet Univerziteta u Travniku.

Skup su u ime domaćina, Univerziteta *Bahcesehir*, pozdravili Enver Yucel, potom dosadašnji predsjedavajući Odbora prof. dr Mahkam Azamovič Mahmudov (Mahmudzoda) iz Tadžikistana, te prof.dr. Ilber Ortayli, direktor *Topkapi saraya* i profesor na *Galatasaray* univerzitetu u Istanbulu. U radnom dijelu seminara svoje radove i saopćenja su podnijeli:

Witold Wolodkiević, Marija i Jan Zablocki, Elzbjeta Loska, Rita Jaworska - Stankiewicz i Piotr Niczyporuk (Poljska), Kadir Gurten, Seldag Gunes Peschke, Esref Kucuk, Basak Karaman i H.Murat Develioglu (Turska), Riccardo Cardilli, Giancarlo Tadei Elmi, Antonio Saccoccio i Pierangelo Catalano (Italija), Mahkam Mahmudov i Zarif Alizoda (Tadžikistan), Saltanat Esetova i Aula Ibrajeva (Kazahstan), Manana Kopalani (Gruzija), Tatjana Filipova, Natalija Sredinskaja, Julija Labovskaja, Aleksandr Kopilov, Jevgenij Njekrasov, Nina Bezik, Andrey Shirvindt, Tatjana Aleksejeva, Igor Ostapovič, Marija Čupova, Aleksej Mamičev i Nina Bulanova (Rusija), Teodor Sambrian (Rumunija), Xu Guodong (Kina), Srđan Šarkić i Samir Aličić iz Novog Sada (Srbija), Ivana Jaramaz-Reskušić i Marko Petrak iz Zagreba (Hrvatska) i Nevenka Bogojević-Gluščević iz Podgorice (Crna Gora).

Rad predstavnika Bosne i Hercegovine pod nazivom „ *Elementi rimskog*

---

\*Prof.dr., Pravni fakultet Univerziteta u Zenici.

*prava u obligacionom pravu srednjovjekovne Bosne*“ (*Gli elementi di diritto romano presenti nel diritto contrattuale dello Stato medievale di Bosnia ed Ercegovina, Bosna Hersek Orta Cag Devletin Sozlesme Hukukunda Yer Alan Roma Hukuku Unsurlari*), bio je prihvaćen sa vidnim zanimanjem, jer je to prvi rad iz Bosne i Hercegovine koji je podnesen na ovim euro-azijskim susretima, izlagan je na ruskom i talijanskom jeziku, a bio je preveden i na turski jezik, pa je tako bio dostupan svim učesnicima seminara. „Dobri duh“ seminara je svakako Pierangelo Catalano, prvi zagovornik i idejni tvorac euroazijskih susreta romanista i ugledni nastavnik rimskog prava na prestižnom univerzitetu „*La Sapienza*“ u Rimu, čija je inicijativa do danas rezultirala i srazom romanista Evrope, Azije ali i Južne Amerike.

Šta reći o značaju seminara? Okupiti na jednom mjestu romaniste Evrope i Azije je samo po sebi zahtijevno, ali i učešće veterana evropske romanistike poput profesora Witolda Wolodkijeviča sa Varšavskog univerziteta ili odlične ekipe sa ruskih univerziteta na čelu sa visprenom Tatjanom Aleksejevom, sa Univerziteta Sankt Petersburg, dalo je susretima dostojan kvalitet. Učešće izlagača iz naše šire regije bilo je zapaženo po kvaliteti i dobrim radovima koji su odslikali realno stanje romanistike na ex-Yu prostorima, kolege Marko Petrak i Srđan Šarkić su predsjedavali dijelovima sesija seminara, dok nam je posebno zadovoljstvo priuštio mladi kolega Samir Aličić iz Novog Sada koji je na susretima promovisao svoj prevod i vlastito izdanje devete knjige Justinijanovih „*Digesta*“-sve čestitke! Nakon prevoda svoga učitelja profesora Antuna Malenice, koji je preveo i objavio prvu knjigu „*Digesta*“, docent dr. Aličić je nastavio njegov rad i time doprinio širenju ugleda „*Novosadske romanističke škole*“ na širim prostorima regije.

Najsvečaniji trenutak je bio svakako kraj seminara koji je zaključen dodjelom počasnog doktorata univerziteta „*La Sapienza*“ predsjedniku Ustavnog suda Republike Tadžikistan, akademiku i uglednom romanisti Mahkamu Mahmudovu i najzaslužnijem čovjeku Azijskog kontinenta za razmjenu mišljenja, ideja i radova sa romanistima Evrope.